



## ICC-ip tusagassiorfinnut nalunaarutaa

8. december 2020

### Issittumi inuiaqatigiinnut atortulersuutit amigaateqarput -

### Inuit Nunaanni tamarmi aningaasaliissutit amerlasuut pisariaqartinneqarput

*"Inuit Nunaanni tamarmi Covid-19-imik nappaalaneq inuiaqatigiinnut atortulersuutitigut amigaatit qanoq aaqqittariaqartiginnerannik ersersitsilluarpoq. Amigaataasummi tamakku pissutigalugit inuiaqatigiit sanngiinnerulersarput aammalu peqqissutsikkut ajornartorsiutit annertuut aallartittarlutik, soorlu innuttaaqaterpassuatta tamanna maanna misigisaraat",*

ICC-ip Kalaallit Nunaanni siulittaasua Hjalmar Dahl Naalagaaffiit Peqatigiit (FN) Nunat Inoqqaavisa pisinnaatitaaffii pillugit Immikkut Ilisimasallit Suleqatigiiffianni (EMRIP) 30. novemberimiit 4. december ilanngullugu qarasaasiakkut ataatsimiittoqarnerani oqalugiarnermi oqarpoq nangillunilu:

*"Inuiaqatigiinnut atortulersuutitigut amigaatit peqqissutsikkut ajornartorsiuterujussuannorsinnaapput. Najugaqatigiinni inuit amerlavallaalertarnerat, inuussutissaaleqileratarsinnaaneq, inuit inuunertunnginnerusarnerat, imminut toqunneq kiisalu tuberkulose tassaapput inuiaqatigiit akornatsinni naligiinnginnerit nalaattakkavut, inuiaqatigiinnut atortulersuutit amigaateqarnerannut attuumassuteqarluinnartut. Nunagisatsinni angerlarsimaffippassuit kuuginnartumik imeqanngillat kuutsittakkanillu perusuersartarfeqaratik. Covid-19 Inuit Nunaanni illoqarfinnut mikisunut avinngarusimasunullu assut ilungersunartorsiortitsivoq. Suut suliniutigineqarnissaannik apeqqut naleqquttumik erseqqissumillu oqartussanit akineqanngippat Covid-19 pilertoqisumiksuli tuniluussinnaavoq."*

Hjalmar Dahl nangilluni oqarpoq, issittormiut silap pissusaata allanngorneranit eqqugaasimaqisut inuiaqatigiittut atortulersuutaat silap pissusianit sunnertiasuunngitsut aningaasaliiffigineqarnissaat qularnaassallugu assorujussuaq pingaaruteqartoq.

Hjalmar Dahlip saqqummiinnermini oqaatigaattaaq Inuit aningaasarsiornikkut, inuttut kulturikkullu pisinnaatitaaffiik qularnaarissagaanni iliuusissat taaneqareersut aqqutissatuaasut. Suut ajutoorfiusinnaasut millisarniarlugit kiisalu naalagaaffiit allat inuuniarnikkut aningaasatigullu naligilerniarlugit alloriarnerit taakku pisariaqarput, kiisalu massakku nappaalaneqarnera nappaatillu allat ulorianarsinnaasut eqqarsaatigalugit, inuit peqqissusiat atugarissaarnissaallu pillugu suliniutissat taakku pisariaqarluinnarput. Peqqissutsikkut, atugarissaarnikkut kulturitsinnillu attasisinnaassutsitta qularnaarniarnerani inuiaqatigiikkuutaat Inuit siuttutsinnik peqateqartariaqarnerput ersarippoq.

### Piviusut:

Expert Mechanism on the Rights of Indigenous Peoples (EMRIP) Naalagaaffiit Peqatigiit nunat inoqqaavisa pisinnaatitaaffii pillugit piginnaatitsiviisa ilagaat. EMRIP nalinginnaasumik aasat tamaasa Naalagaaffiit Peqatigiit Genevemi Inuit pisinnaatitaaffii pillugit Qullersaqarfiani ataatsimiittarpoq. Ukioq manna ataatsimiinneq Covid-19-imik



P.O. Box 204, 3900 Nuuk. Att. Hjalmar Dahl: [hjalmar@inuit.org](mailto:hjalmar@inuit.org); +299 323632

INUIT

nappaalaneq pissutigalugu allaassuteqarpoq. Taamaammat ataatsimiinneq 30. november – 4. december qarasaasiatigut attaveqaatit atorlugit ingerlanneqarpoq tamatumani una qulequtarineqarluni: "Covid-19-ip nunat inoqqaavisa pisinnaatitaaffiit sunniutaa, tak. *Nunat inoqqaavisa pisinnaatitaaffii pillugit Naalagaaffiit Peqatigiit Nalunaarutaat* (UNDRIP)

**Paasissutissat sukumiinerusut:**

<https://www.ohchr.org/DA/Issues/IPeoples/EMRIP/Pages/EMRIPIndex.aspx>